

DATE : 5 May 2015
PUBLICATION : Bernama.com
SECTION : Ekonomi
HEADLINE : Maybank Am Sasar RM20 Billion Aset Dalam Pengurusan Akhir Tahun



Maybank Am Sasar RM20 Billion Aset Dalam Pengurusan Akhir Tahun

KUALA LUMPUR, 5 Mei (Bernama) -- Maybank Asset Management Sdn Bhd (Maybank AM), cabang pengurusan aset Maybank Asset Management Group Bhd, menyasarkan aset dalam pengurusan (AUM) kumpulan itu melebihi RM20 bilion menjelang akhir tahun.

Ketua Pegawai Eksekutif Kumpulan Maybank Asset Management Group Nor' Azamin Salleh berkata sehingga 31 Mac, 2015, AUM kumpulan itu berjumlah RM15.2 bilion.

Beliau berkata kumpulan itu yang tumbuh 21 peratus pada 2014, dan merupakan syarikat pengurusan aset paling pesat berkembang, juga menyasarkan kadar pertumbuhan yang sama tahun ini hasil daripada pelbagai strategi, termasuk pelancaran dana baharu ekuiti Islam.

Beliau bercakap pada sidang media sempena pelancaran dana ekuiti Islam pertama kumpulan itu dalam rangka kerja pasport ASEAN yang dikenali sebagai 'Maybank Bosera Greater China ASEAN Equity-i Fund', usaha sama dengan Bosera Asset Management (International) Co Ltd.

Turut hadir Timbalan Ketua Eksekutif yang juga Ketua Strategi Portfolio Bosera International Conrad Cheng.

Usaha sama strategik ini membolehkan kedua-dua syarikat memanfaatkan pengalaman satu sama lain serta kehadiran kukuhnya di banyak negara untuk capaian geografi yang lebih baik kepada lebih ramai pelabur berpotensi, kata Nor' Azamin.

"Dana itu, dana pertama patuh Syariah yang diperkenal menerusi skim pasport ASEAN yang diluluskan oleh Suruhanjaya Sekuriti pada Mac 2015, disasarkan untuk meneroka potensi besar pasaran ekuiti China dan ASEAN," katanya.

Beliau berkata dana itu menyasarkan untuk mencatat pertumbuhan modal dalam jangka masa panjang dengan melabur dalam saham-saham patuh Syariah atau sekuriti lain yang bersamaan saham dengan sasaran pulangan antara tujuh dan 12 peratus setahun pada asas tiga tahun.

Kumpulan itu menjangkakan aset-aset patuh Syariahnya mencecah RM9 bilion menjelang akhir tahun, katanya.

Nor' Azamin berkata kumpulan itu, yang menyasarkan untuk mengumpul antara RM70 juta dan RM100 juta bersama Bosera Fund tahun depan, berharap mencatat angka yang lebih baik di China, Hong Kong, Thailand dan Singapura.

-- BERNAMA